

光緒吉林通志

吉林通志卷一百四

人物志三十三

國朝十八

圖海

果斯海

根特

莽奕祿

武穆篤

宏世祿

邁圖

伊巴罕

額赫納

鄂泰

珠滿

哈山

碩岱

諸父庫禮

莫洛

格斯泰

薩布素

圖海姓馬佳氏世居綏芬隸滿洲正黃旗天資忠懇
有文武才順治二年由筆帖式游歷國史院侍讀八
年擢秘書院學士明年

恩詔予騎都尉世職十年授文館大學士列議政大臣十二
年加太子太保署刑部尙書明年考滿加少保十五
年與大學士巴哈納等校訂律例尋坐鞫江南考試
作弊事遲延削加銜明年侍衛阿拉那等相毆事具
武拉禪傳刑部審理未允被

詰問不以實對下廷臣議坐死得

旨寬免罷職十八年

世祖上賓遺命起用

聖祖嗣位授本旗滿洲都統康熙二年流賊郝搖旗劉體純
李來亨等竄據湖廣鄖襄山中

命爲定西將軍副靖西將軍都統穆里瑪率禁旅會楚蜀兵
討之至與總督李國英提督鄭蛟麟總兵俞奮起于
大海署護軍統領根特等連營扼之賊兵三千犯奮
起營援擊敗去旣連犯諸營各分兵夾擊賊潰走未
幾副都統杜敏擒郝搖旗於黃草壩斬之劉體純亦
相繼破惟李來亨擁眾據茅麓山恃險未下率兵圍
焉外援絕而餘寇亦搜剿略盡賊勢窮蹙來亨自經

死降僞官及兵眾四千有奇師還晉世職一等輕車都尉六年授宏文院大學士充纂修

世祖實錄總裁官明年

命測儀象八年

命錄刑部重囚並稱

旨明年乞解機務專力戎行

聖祖慰留之十一年

命清理刑獄明年冬吳三桂反十三年耿精忠亦反

聖祖簡才籌餉

命署戶部尙書明年春疏請

敕各行省軍需不得私派夫役不得先期拘集定額外不得苛斂錢糧詞訟重者速審速結小者不得濫准衙蠹土豪不得魚肉良善得

旨允行察哈爾部布爾尼劫其父阿布柰以叛

命爲副將軍同撫遠大將軍信郡王鄂扎率師往討師次達祿布爾尼伏兵山谷而自迎戰兩軍接伏發土默特兵爲所撓分拒之賊騎四百繼至力戰殲焉布爾尼悉眾以火器來攻嚴陳以待時其隙擊之賊敗復聚躬督護軍統領哈克山副都統吳丹等猛進賊敗潰布爾尼僅以三十騎遁招撫人戶千三百餘而科爾

沁額駙沙津方以兵來會遇布爾尼遁經扎魯特境
追斬之察哈爾平凱旋

聖祖御南苑大紅門迎勞之論功晉一等男爵十五年貝勒
洞鄂攻叛將王輔臣於平涼未克

命爲撫遠大將軍率師討之洞鄂以下並受節制既至諸將
請急攻曰賊固在掌握中但生靈數十萬皆

朝廷赤子爲賊所劫覆巢之下必多殺傷緩之俟計窮出降
仰體

聖主好生之德不亦美乎平涼城北虎山墩高數十仞賊守
以精兵與城中犄角且通西北餉道於是令諸將曰

得此墩城不攻自下矣率兵仰攻賊萬餘環列火器以死拒戰兩時許我軍番進斬偽總兵二賊被殪及墜崖死者無算遂奪其墩據之城中舉動目之了然輔臣懼乞降以

閱

詔赦其罪令副都統吳丹入城撫定秋毫無所犯振流亡掩
謁幣奏蠲被兵及轉餉各州縣賦從之遣振武將軍
佛尼埒敗賊將吳之茂於牡丹園等處將軍穆占攻
樂門敗賊於紅崖復禮縣僞固原巡撫陳彭及慶陽
總兵周養民嘉峪關總兵王好問關山副將孔蔭雄

四
等僞官九百餘兵四萬八千有奇先後降關隴悉平
詔曰圖海器識老成才猷練達贊襄機務宣力

累朝以文武長才兼忠愛至性勞績茂著克副委任朕心嘉
悅可晉封三等公世襲罔替當是時平涼慶陽初定人心
未甯而漢中興安賊猶據守分兵防諸要隘別遣一
旅赴湖廣會剿吳逆

詔率精銳親行奏陳陝西反側未安恐有變

聖祖因令留鎮授穆占爲都統佩征南將軍印率師赴楚冬
議取漢中興安檄提督孫思克赴秦州趙良棟赴鳳
翔而將軍侯張勇王進寶各引軍助之期明年正月

進兵

詔下勇等會議以

聞勇等言宜視夏秋收穫豐歉再圖進取圖海以漢興山路險峻夏秋多霖潦賊守宜堅請如前奏明年正月議上

聖祖慮克復漢興守兵益增轉餉不易若俟夏秋糜餉以老師亦屬非計

詔守要隘分兵赴荊州會剿吳逆由是議寢尋招撫韓城等縣降僞總兵喬斌以下官百餘遣兵逼禮縣益門先後敗賊五盤山喬家山復塔什堡秋

賜服物並

御製詩二章十七年春奏分兵兩路取漢興

密詔止之慶陽袁本秀受吳逆僞札作亂遣兵會王進寶討之斬本秀於衛遠溝餘眾潰散冬請入京面奏事宜

許之明年春遣陝夏賊犯棧道益門鎮各口奏以提督趙良棟進兵臨武寨相機而行會湖南廣西平

詔急殲寶雞之賊恢復漢興以平蜀地尋破益門鎮賊毀偏橋兵不能進疏其狀以

問

詔嚴超之秋取漢中興安分兵四路自率將軍佛尼埒等趨

興安總兵陳福亮爲後援將軍畢力克圖提督孫思克等由略陽進總兵朱衣客爲後援將軍王進寶總兵費雅達等由棧道趨漢中總兵高孟爲後援提督趙良棟由徽縣進剋日並發圖海師次鎮安縣分兵爲二攻僞總兵王遇隆於火神崖敗之渡乾玉河奪梁河關僞將韓晉卿遁四川進寶復漢中良棟復徽縣略陽畢力克圖復成縣階州大軍進自梁河關復興安降僞將軍謝四總兵王永世以下官三百八十餘兵萬四千有奇而平利紫陽石泉漢陰洵陽白河及湖廣竹山竹溪上津等縣皆下畢力克圖復遣參

將康調元復文縣降僞洮岷道王文衡先是進寶良棟捷奏先至

聖祖以圖海畢力克圖遲緩切責之捷

聞得

溫旨下部議功尋

命駐守鳳翔明年春

詔赴漢中轉餉濟蜀師其秋陝西總督哈占溯保甯江擊賊

譚宏

命發兵爲聲援以分賊勢初康熙十二年姦民楊起隆詐稱

朱三太子謀作亂京師正黃旗周公直家奴陳益要

姦徒十人於家將應之公直首其事圖海時兼正黃
旗都統率兵圍之陳益等就縛至是獲起隆送京師
二十年春賊犯四川敘州等處遣副都統翁愛往援
仍奏請親行

詔駐漢中可兼顧秦蜀秋以疾還京師尋具疏乞休

聖祖慰留之其冬卒累官太子太傅中和殿大學士兼吏部
尙書三等公爵

賜祭葬如典禮加祭二次諡日文襄明年

太宗實錄告成嘗充監修總裁官追贈少保仍兼太子太傅

二十二年

御製碑文立於墓道雍正二年加贈一等忠達公配享

太廟尋

命建專祠

御製文勒石旌之崇祀陝西名宦子諾敏襲爵官至禮部尙
書圖海御軍於趨事赴功迹近濡滯而不務一切期
於有成

聖祖以老成稱之知人則哲能官人豈不信哉

果斯海姓納喇氏世居葉赫父阿拜

太祖時來歸後隸滿洲正紅旗順治七年果斯海由工部筆
帖式累遷員外郎尋擢工部給事中十八年疏請八

旗於京城各門外分設教場練習士馬得

旨如所請行又疏陳五事一輔政四大臣應定祿品與職任相稱一督撫大吏應遴才委任無分漢軍漢人一軍政黜陟宜公平一文武官品級宜畫一一要地城守軍器請停遣部臣巡察嚴實所司覈報至步兵虛額應卽充補亦令各專轄大臣造冊送部得

旨所奏更定輔臣祿品一款不必議餘下所司議行康熙七年疏言民兵服色僭濫及一切關風化者請嚴行飭禁各佐領下戶口請以贏絀定賞罰又請減省重複案牘以歸簡要下所司議行九年遷內閣侍讀學士

充纂修

玉牒官轉太常寺少卿預纂

太祖

太宗聖訓十一年遷內閣學士充重修

太宗實錄副總裁官十四年擢兵部侍郎充

經筵講官明年山東提督周卜世疏劾巡撫達爾布徇庇屬
員侵漁百姓達爾布亦劾卜世挾讐構陷請遣官質
之奉

命往勘達爾布違例脅眾建立生祠事實坐視職十六年調
倉場侍郎十七年擢左都御史疏請滿洲蒙古朝鮮

人毋許賣與漢軍漢人八旗各佐領下出賣人口毋許出本佐領外應著爲禁令

詔從之尋遷兵部尙書時軍興急度支以才

特命兼理戶部事二十年調禮部尙書其秋

詔刑部民命所關必精明幹練始克勝任果斯海向在兵部才能素著其以禮部尙書銜管理刑部事明年冬卒

遣內大臣奠茶酒

賜祭葬如故事諡曰文敏果斯海之居諫院言遴才無分漢軍漢人言禁民兵服色僭濫已無忝厥官至減省案牘尤有味其言之也案牘之繁有一事十數轉而積

三才圖會卷一百四
九
紙盈尺者稽時滋費而弊緣以生於是吏胥爲政天下事益冗不可治其請歸簡要旨哉言乎

根特姓瓜爾佳氏世居尼馬察父尼努

太祖時與兄尼唐阿率眾來歸並任佐領後隸滿洲鑲藍旗
尼努事

太宗以能予騎都尉世職天聰八年隨副都統巴奇蘭征虎爾哈部有功兼一雲騎尉卒根特襲尋任刑部理事官順治元年署前鋒參領隨睿親王多爾袞入山海關敗流賊李自成黨唐通於一片石追自成至望都復敗之偕前鋒參領阿爾布尼討馬勝口土賊撫定

其餘論功晉世職輕車都尉四年授協領駐防西安
時王光泰叛據鄖陽

詔侍郎喀喀木率禁旅自河南進討並調西安駐防兵根特
率以往破賊黨甄以鍾於房縣師旋擊賊方國成於
谷口敗之六年姜瓖叛大同所在多陷隨總督孟喬
芳侍郎額色統軍渡河討賊連復蒲州臨晉河津進
窺平陽賊黨白璋引步騎六千阻滎河拒戰偕副將
趙光瑞等力擊大破之逐北至黃河賊未及濟遽前
薄之溺死者無算斬白璋餘賊竄孫吉鎮悉殲焉移
師猗氏偽監軍衛登芳依山結寨與賊黨張萬全相

犄角分兵擊萬全斬之殲其眾乘勝薄登芳寨陳斬
僞將王國興等擒登芳進聞喜敗僞都督郭中傑兵
於侯馬驛追奔三十里斬獲無算九年還京以功兼
遇

恩詔晉世職一等兼一雲騎尉明年隨貝勒屯齊征湖廣時
孫可望馮雙禮白文選等據武岡我軍自永州趨寶
慶賊眾十餘萬扼險以拒兩軍接以驍騎突之賊陳
亂我正黃正紅二旗兵戰賊方急馳與夾擊賊大敗
師進武岡賊騎千餘來犯復敗之十一年隨甯海大
將軍伊爾德征浙江舟山以右翼敗阮思陳六御兵

獲其戰艦及紅衣礮舟山平明年論湖廣功晉男爵
署木旗副都統十四年論舟山功晉爵一等明年擢
本旗蒙古都統康熙十六年遷本旗滿洲都統列議
政大臣二十三年以老病乞休三十二年卒

賜祭葬如故事諡曰襄壯子格圖肯襲

莽奕祿姓富察氏先世居葉赫祖阿布岱以功予騎
都尉世職隸滿洲鑲白旗

世宗時擡入正白八旗之次

國初設黃白紅藍四旗後增四鑲尋以兩黃正白爲上
三旗由是觀之鑲不先正可知或稱上三旗曰鑲黃

正黃正白特取便文非八旗卽以是爲次也順治元年莽奕祿襲職七年九年三遇

恩詔晉世職二等輕車都尉十一年以署參領隨靖南將軍珠瑪喇征廣東時明桂王朱由榔將李定國步騎四萬據新會縣之山峪列礮象爲陳我軍追擊陳潰其別將以騎四千自山巔馳下又逆敗之定國走廣西師旋以功晉世職一等康熙元年授護軍參領十三年吳三桂反署護軍統領隨大軍赴湖廣征之十五年軍次石首縣進太平街賊四千餘來拒偕護軍統領伊勒都齊敗之斬百餘級又隨貝勒察尼追敗之

斬三百餘級十七年擢鑲白旗蒙古副都統十九年
隨征南將軍穆占進兵貴州復靖遠清平及平越府
時三桂子世璠據貴陽而僞將軍韓天福據新添衛
偕前鋒統領薩克察率驍騎先擊天福殲賊千餘乘
勝復龍里縣進薄貴陽世璠遁克之並定所在城衛
明年春趨平遠州賊將高起隆夏國相王會等以眾
二萬據城西南山偕副都統花色等與戰殲賊四百
有奇進攻其城自午至酉再接再勝斬級千餘王會
降起隆等遁復平遠降僞官三百四十兵三千有奇
同遊擊王成功殲逸賊連敗之多所斬馘復黔西大

定諸城擒僞巡撫張維堅遂入雲南與大將軍賚塔
軍會勦靖調滿洲副都統

命參贊軍務冬世璠自殺雲南平還京故事累功牌六則晉
職所得五不及敘二十二年遷護軍統領管佐領明
年擢鑲白旗蒙古都統尋調滿洲三十年授荊州將
軍四十二年以老乞休

允之時

聖祖幸塞外因赴

行在

賜御書引年老將額

御衣一襲東珠頂帽孔雀翎班於內大臣其秋卒年七十
賜祭葬如故事諡敏肅子色爾敏襲

世宗御極

恩詔下部察功牌闕一者咸與敘於是莽奕祿追兼一雲騎
尉且擢其旗擡旗異數也武穆篤者殆族人而遠近
未詳自有傳

武穆篤葉赫富察氏祖穆哈連天聰時來歸隸滿洲
鑲黃旗武穆篤順治十五年以護軍參領隨信郡王
多尼征明桂王朱由榔由貴州趨雲南擊敗其將李
成蛟於涼水井李定國於雙河口進至盧噶定國復

列象陳以拒力戰敗之逐北至磨盤山子雲騎尉世職十八年隨大軍討山東土賊有功康熙八年擢前鋒參領十三年耿精忠反福建

詔貝子傅拉塔爲甯海將軍武穆篤爲前鋒統領由浙江進討冬次台州賊將曾寶陳理營黃瑞山欲來犯偕副都統吉爾塔布提督塞白理與戰敗之進至蒲塘又連敗僞總兵吳臣將軍楊德明年趨涼遼隘口敗賊伏兵賊夜遁偕諸將追擊於黃土嶺賊退據黃巖縣進圍之賊帥曾養性遁降僞官二十兵三千復其城次上塘嶺養性糾僞都督馬士玉張廣文等水陸兵

三萬拒戰率所部爲軍鋒突入賊陳大破之斬僞官六十賊眾無算復太平樂清青田三縣及大荆盤石二衛而身亦被數創明年大軍發處州至雲和縣石塘嶺地當溫州入閩之衝賊據險死守副都統沃申總兵陳世凱攻其前綴賊偕諸將乘大霧直擣賊巢破之十七年創發卒於軍喪還

遣領侍衛內大臣奠茶酒十九年

聖祖以功績茂著

特命照實授前鋒統領例議卹晉世職騎都尉

賜祭葬如故事諡襄壯子綳色襲雍正七年入祀昭忠祠

宏世祿姓瓜爾佳氏世居瓦爾喀祖噶錫屯

太祖時率眾來歸任佐領後隸滿洲鑲紅旗順治十一年宏世祿由佐領授護軍參領十八年隨定西將軍愛星阿征雲南師至緬甸阿瓦城獲明桂王朱由榔康熙三年予雲騎尉世職十二年擢本旗蒙古副都統十四年察哈爾部布爾尼叛信郡王鄂札副將軍圖海率師討之

命與護軍統領哈克山副都統烏丹參贊軍務軍次達祿布爾尼設伏山谷躬自拒戰率右翼與諸將分進伏發因夾擊之殲其眾布爾尼悉潰眾復出再戰再北以

三十騎遁師還晉世職輕車都尉明年調滿洲副都
統十九年

命與都統瑪奇趙璉副都統祖植椿率兵往廣西參贊大將
軍賚塔軍務征雲南逆孽吳世璠僞將軍何繼祖以
眾萬餘扼石門坎與諸將攻奪之復安龍所城進軍
黃草壩僞將軍詹養王有功等九人踞守率所部爲
軍鋒鏖戰自卯至酉殪賊二千有奇乘勝復馬龍州
易龍所楊林城有賊屯渾水塘與嵩明州相犄角遣
營總顧塔幹都海等攻嵩明州克之渾水塘賊棄營
夜遁進壁歸化寺冬世璠自殺雲南平二十三年甄

別入旗諸臣坐不能攝下應視

聖祖以年老免議尋乞休

允之二十七年卒

賜祭葬如故事子龍科襲其雲南之功未敘史闕之矣

邁圖姓佟佳氏世居哈達父烏進

國初來歸任典儀順治五年邁圖以二等侍衛從征山東破賊踞齒牙山巖十五年隨信郡王多尼征明桂王朱由榔至貴州連破其將李成蛟李定國康熙十三年授營總兵從康親王傑書征逆藩耿精忠明年大軍自仙居趨黃巖僞都督劉秉仁以眾萬餘拒戰

半山嶺偕副都統吉勒塔布力擊敗之殪二千有奇
十五年戰建陽縣敗賊三千餘明年鄭綿造其總督
趙德勝將軍何祐等以眾四萬據興化營城西北太
平山者二十有六伏賊萬餘於白茅山爲援隨甯海
將軍拉哈達先攻白茅山之伏其眾潰走太平山躡
擊連破其營陳斬得勝復興化祐退泉州進拔之士
七年隨平南將軍賽塔攻劉國軒吳淑等於蜈蚣山
破其七營復長泰縣二十五年授本旗蒙古副都統
兼佐領二十九年署前鋒統領隨裕親王福全征厄
魯特部噶爾丹戰烏蘭布通陳沒

賜祭葬如故事

特旨加祭一次諡曰忠毅初予雲騎尉世職三十年追論所累戰功晉輕車都尉子瑪喇襲

伊巴罕姓格濟勒氏世居雅蘭後隸滿洲正白旗伯父舒球天聰八年隨副都統薩木什克巴奇蘭等征黑龍江有功授騎都尉世職卒無子以伊巴罕襲初任三等侍衛改刑部郎中兼佐領順治七年九年三遇

恩詔晉世職至二等輕車都尉十八年署參領隨定西將軍愛星阿征明桂王朱由榔於緬甸緬人以由榔獻康

熙十四年任護軍參領隨定南將軍希爾根討逆藩
耿精忠師至江西僞都督易天錫據建昌府率兵攻
之大敗賊眾旣而撫州賊來援逆擊之卻去城中僞
將軍邵連登僞總兵李茂珠等復出戰又敗之尋與
護軍統領桑額攻復新昌縣擒斬僞總兵朱一典及
賊黨無算明年擢本旗蒙古副都統隨安親王岳樂
討逆藩吳三桂擊敗其僞將軍夏國相等復萍鄉縣
十八年隨征南將軍穆占討三桂遺孽世璠師自衡
州進武岡賊將以二萬眾營楓木嶺死拒率所部大
破之明年擢前鋒統領二十二年授

盛京將軍二十四年

召還仍任前鋒統領論江西湖廣戰功積晉世職一等兼一
雲騎尉年老致仕卒子蘇完任改襲輕車都尉以前
吏部敘

恩詔過濫云

額赫納姓納喇氏祖蘇巴海

國初自葉赫來歸隸滿洲鑲藍旗父渥和訥任佐領額
赫納襲職順治初任護衛遷護軍參領十四年隨宵
南靖寇將軍貝勒洛託征雲南康熙元年隨靖東將
軍濟席哈平山東土賊于七並有功十一年擢本旗

蒙古副都統尋駐防兗州十四年逆藩耿精忠分犯江西

詔簡親王喇布爲揚威大將軍由江甯移鎮額赫納參贊軍務明年春麻姑山賊王永召等犯會城偕副都統席布擊敗之初叛鎮馬雄結滇賊王宏勳擾廣東

聖祖命簡親王卽副都統額赫納巴爾堪擇一爲將軍統兵往援王舉額赫納

命倍道速進未至平南王尙可喜病子之信以韶州南雄應賊連閩粵諸寇謀犯贛州於是退守南贛賊屯蓮塘口擊斬僞將黃輝陳可相敗其眾進軍芝坪擊敗僞

總兵吳漢興焚賊營二十餘其冬廣東提督嚴自明反陷南康進圍信豐偕副都統穆成格援之擒斬萬餘自明走南安信豐圍解十六年

命莽依圖爲鎮南將軍以額赫納參贊軍務赴粵抵韶州之信反正自明亦獻南安降偕江甯將軍額楚分擊逆藩吳三桂僞將馬寶王錦等營於韶州城下破走之廣西巡撫傅宏烈兵單莽依圖疏以額赫納赴梧州與合

詔如所請明年調滿洲副都統廣東總兵祖澤清據高州反命同勦軍次電白賊悉精銳以拒陳斬僞總兵江瓊等磔賊

四千餘賊黨王得功以城降進軍高州澤清挈家遁
十八年會莽依圖軍於貴縣由橫州趨南甯勦賊渠
吳世琮戰新村世琮中流矢以二十騎遁

詔速珍餘黨進取雲南冬調護軍統領明年大軍進貴州於
陶登遇僞將軍范齊韓馬承烈逆戰同都統貝勒希
福分路擊敗之斬獲無算二十年以前鋒攻奪安籠
所黃草壩偕希福破賊曲靖府羅平州界拔二十二
營多所斬獲雲南平凱旋二十三年調前鋒統領明
年授滿洲都統尋列議政大臣二十九年噶爾丹侵
喀爾喀部內犯

命同侍郎溫達等由歸化城分路偵禦會爲裕親王福全所敗遁去還京三十五年以老乞休

允之四十四年卒

賜祭葬如故事迹其戰功例宜得世職史未詳也

鄂泰姓瓜勒佳氏世居蘇完隸滿洲正白旗順治四年從征百戶所先登克其城予騎都尉世職七年從征江西先登克九江府

賜號巴圖魯晉世職二等輕車都尉九年授

盛京副理事官坐事罷任削世職起授參領康熙十年

擢

盛京副都統十三年王輔臣反陝西定西大將軍貝勒
洞鄂奉

命討之

詔鄂泰率盛京兵一千來京明年

敕以陝西沿邊有路通山西汾州逆賊或乘隙來犯其授鄂
泰建威將軍率所領盛京兵往駐太原防守夏

命赴西安參贊軍務其建威將軍印以副都統烏丹代時輔
臣說連川賊偕署副都統阿爾瑚掘寶雞縣棧道旣
而川賊李冉二姓出犯九龍山合擊盡之而僞總兵
任德望等率賊眾及裸裸七千餘來援營益門鎮者

七與阿爾瑚分九路進攻閩兩時許悉破其營德望以百騎遁驍騎校韓楚漢追射中其股降之斬獲甚夥十五年殲餘賊紅崖堡

詔嘉其功下部優敘明年卒於軍二十五年追授騎都尉兼一雲騎尉世職子鄂山襲

珠滿姓瓜爾佳氏祖多和倫自烏拉歸

太祖殺滿洲正白旗從征明廣甯錦州有功予雲騎尉世職次子額赫瑪瑚以侍衛從征鄭成功戰廈門陳沒

卹贈雲騎尉世職無子以兄子嗣襲卽珠滿也洊官參領康熙十三年逆藩耿精忠反江西應吳三桂隨征南將

軍尼雅翰討之擊敗賊眾犯南康者又敗他賊於河
津十五年從復吉安破賊眾惶恐明年隨鎮南將
軍莽依圖征廣東次韶州僞將軍馬寶等渡河來犯
大軍分拒之率右翼力戰連破賊寶等宵遁十八年
進兵廣西破賊將吳世琮於南甯新村明年討柳州
叛賊馬承烈道出陶登擊賊黨范齊韓等其冬隨征
南大將軍賚塔征雲南二十年春連擊敗賊將何繼
祖王宏勳於石門坎黃草壩進薄雲南城陳斬僞將
軍胡國柄隨都統希福追馬寶及巴養元於烏木山
賊潰降是年雲南平凱旋積功晉世職騎都尉兼一

雲騎尉授侍衛尋擢護軍參領兼管火器營事調前鋒參領三十六年擢荊州副都統三十九年奉

命會剿四川逆蠻比至都統滿丕提督康希順已復打箭爐因駐守鴉隴江四十一年還荊州其秋鎮筮紅苗作亂

聖祖命尚書錫勒達等統師撫剿

詔珠滿久經戰陳軍事與商酌而行冬撫降三百一寨惟天星寨負固不下錫勒達與提督俞益謨分四路攻之別率兵爲應克其寨苗竄葫蘆寨復攻克之斬馘無算四十五年擢江甯將軍明年春

聖祖南巡

賜紫貂冠服及良馬尋卒於官

賜祭葬如故事吏部請以其子撤木貝襲騎都尉兼雲騎尉
詔珠滿奮述戎行勞績茂著眾所共知其世職加一雲騎尉
合爲輕車都尉俾其子承襲

哈山姓富察氏世居訥殷隸滿洲鑲黃旗順治十四
年由官學生授鼓廳筆帖式遷刑部主事康熙二十
年監督九江關稅務疏請移關湖口縣

允之明年遷兵部員外郎尋調吏部二十三年

御試八旗文學之臣繙譯

御製竹賦與試者通政使以下筆帖式以上五百餘員

聖祖以滿漢文義嫻否親甲乙之哈山列一等擢右諭德明年轉左二十九年遷內閣侍讀學士再遷內閣學士左副都御史三十六年遷

盛京禮部侍郎四十二年疏言臣部所役網戶採牧校尉等八百二十五人其無力婚娶者百六十有奇以無室家往往不務生計逃避官差請發

盛京戶部銀四萬兩照公庫例派員經理一分生息以六年爲期本還戶部息銀可二萬八千餘兩陸續給無妻壯丁完娶人五十兩餘銀仍以生息久遠有益

下部議從之四十九年遷吏部右侍郎明年轉左

命往科爾沁勒台吉特古斯違禁留阿雜爾喇嘛事得特古斯及侍郎拉都渾欺飾狀具擬稱

旨尋署禮部尙書冬擢刑部尙書列議政大臣五十一年詔刑部事務至爲緊要自哈山受任斥劣員除積弊辦理之事明而不煩一應積案漸次完結其效力可嘉但意在速蕲或致草率刑名關係重大務須加意詳慎以副委任秋疏奏完結各案

優獎焉明年三月

萬壽聖節與

賜年老大臣宴

賚冠服其冬坐

特旨發遣不應援赦之流犯常明彙題釋放罷職五十八年
卒年八十有七子富明安累官總督

碩岱姓嘉塔喇氏先世居尼雅滿山有昂郭都哩巴
顏者

太祖時來歸隸滿洲正白旗順治二年碩岱以二等侍衛兼
參領隨睿親王多爾袞討大同叛鎮姜瓖復渾源州
九年從

幸南苑蒙古侍衛素尼粹拔刀斫一等伯巴什泰於

御前碩岱立舉所執槍刺仆素尼擒之

世祖嘉其勇積前功

子騎都尉兼一雲騎尉世職十五年以護軍參領隨征南將軍卓布泰自廣西征明桂王朱由榔於貴州時其將李定國李成蛟等分據黔西要隘率兵渡盤江進擊連敗之梁瑞津雙河口明年大軍取雲南追定國至騰越遇伏磨盤山率所部力戰又敗之十八年山東土賊于七作亂隨靖東將軍濟席哈討平之事具濟席哈傳康熙六年擢前鋒統領十二年冬逆藩吳三桂反雲南

聖祖以荊州衝要

命率前鋒兵先諸軍進扼之俟諸軍至再前據常德以遏賊勢明年正月至荊州賊尋陷常德及澧州進犯宜昌而順承郡王勒爾錦統大軍始至碩岱奉

詔參贊軍務同護軍統領額司泰等援宜昌擊賊將劉之復陶繼智等卻之十四年

詔責順承郡王久駐荊州郡邑多未復兼罷碩岱參贊十六年安親王岳樂自江西進圍長沙隨征南將軍穆占等移師助攻道出岳州擊賊糧艘數十於韶關河取之既會師長沙賊負固未下

詔穆占移規衡州茶陵賊棄城走攸縣偕都統伊理布追之
賊據河岸以拒進戰敗之遂復攸縣明年隨穆占復
郴州永興桂陽興甯還駐郴州賊將馬寶胡國柱等
犯永興偕伊理布往援戰失利伊理布及護軍統領
哈克三陳沒副都統託岱等還郴州獨以所部入永
興城守穆占奏劾之

詔以功贖旣而賊乘勝逼攻屢瀕於危偕前鋒統領薩克察
攖城固拒閱三月三桂死乃引去十八年大軍復寶
慶武岡徹八旗兵三之一還京同內大臣阿密達等
率以行旣至以永興戰敗罪議罷任革世職二十九

年起正白旗滿洲副都統明年隨定北將軍瓦岱征
噶爾丹至克噶倫河偵賊遣去師還尋偕都統噶爾
瑪率兵駐大同三十五年

聖祖親征噶爾丹師出中路以撫遠大將軍費揚古出西路
費揚古請選大同所駐護軍二百八十人爲前鋒

詔署前鋒統領率之往誘賊特埒爾濟口且戰且卻至昭莫
多與大軍合圍噶爾丹僅以數騎竄去事具費揚古
傳以功擢內大臣授雲騎尉世職

聖祖念著成勞

命復前所革世職晉爲輕車都尉五十一年卒年八十有四

賜祭葬如故事子納丹珠襲海綬其第四子雍正七年以護軍校從征準噶爾戰沒和通呼爾哈諾爾

卽贈雲騎尉世職例傳順治時人止其身國殤也變例著之而碩岱諸父庫禮天聰崇德間大軍征討常別將朝鮮兵以從戰比有功隨前鋒統領薩穆什喀攻明松山北崖科爾沁蒙古兵突來犯礮傷手不退卒擊敗之又隨睿親王多爾袞攻松山敵犯我正紅鎮藍二旗率朝鮮將領勒卜忒與左翼軍并力以禦遂卻去都前後所斬級以千計累

賜牲畜等物甚夥授佐領騎都尉世職順治元年定鼎燕京

兼一雲騎尉三年

命以戶部侍郎駐淮安督催漕糧既至運解如額四年明益王攻據廟灣城乘勝率兵夜逼淮安入自城垣圯處圍總漕署數周率中軍官張大志旗鼓王國印及標兵禦之家人並出助戰其妻悉索署中所有弓矢令家人子女送戰所廕戰至曙敵眾敗陳斬其總兵以下官十有二兵二百有奇事平

召同侍郎任七年以病乞休尋卒

賜祭葬如例諡曰恪僖並於墓道立碑

莫洛姓伊爾根覺羅氏世居長白山之呼納赫祖溫

察

太祖時來歸後隸滿洲正紅旗莫洛順治七年任刑部理事官累遷工部郎中康熙六年擢左副都御史明年出爲山西陝西總督疏請免平涼臨洮鞏昌西安延安鳳翔漢中七府興安州現戶代輸荒地額賦及平涼臨洮鞏昌三府積欠凡數十萬

聖祖並從之八年輔政大臣鼇拜敗法司以有連請逮問詔莫洛雖附鼇拜念任封疆能鼇剔加派火耗等弊從寬留任明年計典吏部以嘗植黨營私

間得

旨禡職西安士庶相率籲留甘肅巡撫劉斗提督張勇柏永
馥總兵孫思克合疏陳其清以持已正以率下如革
耗羨整驛遞息詞訟練士卒清荒熟教樹畜興水利
諸政乞留任以慰民望

詔簡任督撫所以綏靖地方愛養百姓莫洛既爲民愛戴特
順輿情免其處分供職如故未幾擢刑部尙書十三年
聖祖既分命王貝勒大臣討逆藩吳三桂並

敕部臣吳逆煽亂滇黔四川從逆陝西邊陲要地西控番回
南通巴蜀幅員遼闊夙號嚴疆非特遣重臣假以便宜未
易綏靖莫洛前任總督深得民心可授爲經略往駐西安

軍事悉聽調遣加銜武英殿大學士仍以刑部尙書管兵部尙書事

賜之敕印既至部署進討尋被

詔朕聞叛鎮鄭蛟麟乞降及復朝天關甚慰近賊聚岳州值甚雨大兵難行晴霽可水陸並進吳三桂果在澧州宜乘勢徑襲其後如復四川卽取道交水定貴州或趨雲南其餘諸將集議疏言逆賊堅據保甯川境未能遽復容俟奏捷卽行相機進取並奏防禦關隘輓運軍食機宜

詔朝天關諸隘關係要害可於滿洲漢軍綠旗官兵內酌撥防守相爲犄角護送糧艘漢中雖已駐兵恐力猶單朝天

關外尙有別路可通漢中我兵深入後姦宄竊發踞守雞頭關諸隘亦屬可虞一切機宜其酌行之又保寧未能卽復我師益勞頓輓運糧餉實爲要務其源源接濟勿令匱乏夏僞副將姚孟龍等降其賊眾據廣元百丈關者旣前遣都統馬一寶將軍席卜臣赴漢中矣別遣副都統科爾寬趙廣元又慮眾寡不敵令副都統吳國正俟馬一寶至卽移師助之尋

詔貝勒洞鄂貝子溫齊輔國公綽克託等率所部赴四川疏陳大軍久駐保寧與賊相持秦民運餉勞苦臣今赴漢中相機進勦貝勒洞鄂若率眾盡行慮致遲滯請

敕簡精銳先發速至西安

聖祖念貝勒所部無多仍令貝子公等亦各率所部進發會
西安將軍瓦爾喀奏川鎮王懷忠標兵以乏餉潰請
發餉增兵往援

詔莫洛大兵或仍圍保甯或糧運艱阻暫還廣元其與將軍
等酌之並

命賁懷忠標兵罪速行撫納尋疏陳陝省兵單請增兵以資
戰守

聖祖以增兵必須增餉或可不增兵或必當增兵或不必親
行赴川令詳悉疏復復言增兵則秦得自固比四川底定

則糧餉有資而秦民亦得休息臣仍宜統兵進剿四川從之其秋將由秦赴蜀請

敕總督周有德巡撫張德地暨科爾寬等固守朝天關廣元諸路轉運糗糧並請

敕將軍等駐守保甯以俟兵至

詔軍機緩急莫洛自有確見可與將軍席卜臣前往廣元進取昭化總督周有德於經略未到之先督趣糧米運送軍前又廣元兵少或令席卜臣先赴廣元秣馬以待或與同發俱令經略酌行俄僞將軍何德成等糾合賊眾自四川犯甯羌立營於文廟山遣軍夜襲其營賊眾大敗遁

回南山

詔甯羌爲大兵後路卿其速援竄幾有濟旣以實

聞因令提督王輔臣遣兵守甯羌冬貝勒貝子等大兵未至
僞總兵彭時亨復屯踞七盤朝天諸關劫我略陽糧
腹廣元兵缺餉兩月賊眾旋窺陽平

聖祖慮莫洛所統皆綠旗兵巴蜀山路險惡滿洲大兵若不
繼進難於策應

敕貝勒洞鄂等兼程進會同經略入川時莫洛已率兵由漢
中赴蜀令王輔臣隨征而輔臣變先是莫洛至陝
詔遣兵征湖南輔臣請自率兵赴荊州

聖祖以征湖南兵已有貝勒等統領

命仍駐平涼聽經略調遣心旣怏怏矣至是令隨征佯言兵單給騎兵二千少之又言馬疲瘠不任用進徒死於賊搖動軍心十二月莫洛次甯羌輔臣標兵亂襲經略營率兵擊卻之輔臣以悍黨繼至礮矢並發被重創沒於軍

賜祭葬如典禮諡曰忠愍予騎都尉世職兼一雲騎尉子常安襲

格斯泰姓瓜勒佳氏世居瓦爾喀父赫勒

太祖時隨其叔祖幹珠來歸幹珠任佐領赫勒以驍騎校隸

滿洲鑲白旗崇德三年從睿親王多爾袞征明入自
青山口越燕京攻獻縣樹雲梯先登克之六年襲管
幹珠佐領隨貝勒阿巴泰征明自薊州南略至山東
數敗敵兵順治元年豫親王多鐸追破流賊李自成
於潼關明年移師平河南江南及端重親王博洛征
浙江敗敵嘉興城外並在軍有功授雲騎尉世職遇
恩詔晉騎都尉卒長子格森襲格斯泰其次子也初爲睿親
王府一等護衛裁改護軍校隨甯海大將軍伊勒德
征浙江之舟山十三年署前鋒侍衛自甯波率舟師
趨定海明故將阮思陳六御等以眾三萬列二百餘

三
巡於海洋率所部擊卻之諸軍並進斬思與六御舟
山平得頭等功牌二康熙二十年隨都統瑪奇討逆
藩遺孽吳世璠師進自廣西連敗賊石門坎黃草壩
攻雲南城克之擢前鋒參領二十九年隨裕親王福
全征噶爾丹師次烏闡布遁賊於隔岸樹林中卧駝
爲營兵伏其後內大臣佟國綱率兵進擊中槍沒格
斯泰忿甚怒馬躡賊營直入左右決盪出而復入者
再賊無敢撓會諸將繞山腰出賊後夾擊之賊潰力
追至河岸馬陷於淖死之同死者前鋒統領邁圖與
佟國綱並參贊軍務者也及護軍參領赫色巴錫巴

雅爾琿岱營總韓大任前鋒校珠旺勒等初軍出

聖祖賜護軍參領等人一馬前鋒參領未預格斯泰援以請
命自於上駟院擇之得一馬駿而白鼻或言馬誠佳然白鼻
相經所忌笑曰大丈夫以身許

國馬鼻胡爲者至是裕親王奏言當與賊戰見一將乘
印鼻馬三入敵陳眾皆識爲格斯泰云喪歸

賜祭葬如副都統例

遣侍衛奠茶酒部議予雲騎尉世職

聖祖命加一雲騎尉合爲騎都尉子幹珠罕襲乾隆十五年
詔敘八旗世職以死事贈卹而襲次已滿者

特予恩騎尉世襲罔替曾孫英福襲

薩布素姓富察氏四世祖充順巴本當

太祖時由岳克通鄂城率丁壯屯吉林遂家焉隸滿洲鑲黃

旗

陳儀薩布素傳將軍姓傳茶氏自其曾祖哈木都

其先祖固瑪哈里約克通鄂城人也始祖充舜以勇力
聞能手格猛獸而好義愛人遠近慕之嘗獨獵深山
中獲介鷹焉過札刺爾五人欲奪之舜曰誰能手搜
此去者即贈之五人互曳莫能動舜挽其角曳行踰
三重壑五人者大驚相語此必傳茶氏所謂充舜者
也由是名益著歸附日眾乃爲之分田授室人給牛
種而立之約束於是所居成邑遂世爲約克通鄂城
長及哈木都以所部來歸乃徙居長白山之東尋遷
甯古塔撫綏老幼矜恤鰥寡不留餘貲蓋好義愛人
其家法然也聞兵使者滿河上哀異之

順治間薩布素由領催

授驍騎校康熙十六年累遷協領皆在吉林明年擢

甯古塔副都統

陳傳公爲人沈勇好兵略尤喜觀山川形勢嘗曰兵因地爲形猶奕因枰

布勢用兵不知地是奕棋不幾枰也以故隘塞險阻道里遠近多所延訪無不究悉順治九年初仕爲甯

古塔將軍筆帖式康熙元年改驍騎校三年以驍騎校擊郭羅斯於黑喇蘇密有功署防禦七年論功遷

佐領九年將軍奉

詔徙吳蘇禮烏喇之瓜爾

察部族遣協領布朗阿護

其行驍騎昂吳等拒命殺

我三人射傷布朗阿公請往力戰敗之追獲甚眾俘

其子女昂吳僅以身免吳蘇禮烏喇人擒送斬之十

二年論功遷協領十五年徙東地新滿洲於甯古塔

王欽部人不願徙謀潛遁公知其東有間道走徵外

乃白將軍巴海以兵繞出其東道絕遂聽徒王欽部

徙者凡二百餘戶有納喇庫等八十餘人攜孥道亡

公遣兵追捕擒之斬數人以徇自是無敢亡者凡徙至

甯古塔各部族共二千餘戶將軍巴海移駐吉林烏

刺以公留守拊安之築室均田皆手爲經畫俾各適

所願新至如歸焉已而黑金之驍騎校顏奇喀者以

十五戶遁公追擒之送京師十六年諾羅西刺心等處新滿洲三百戶以徙至公拊安之如前十七年巴海赴京師以公攝其軍事十八年晉副都統二十一年雅克薩城之役起

越二十八年與俄羅斯定界額爾古納河北岸擺黑

龍江將軍事具郎坦傳陳傳二十一年上命

之雅克薩城詔公與俱鄂羅斯者北方大國

也廷表數千里包蒙古四十九部外東接界黑龍江

侵逼索倫鄂倫春諸部而雅克薩城其要害公既視

其形勢遂與郎坦等至其城下指畫言可圖公既視

坦以同二十二年大兵遂發公別以舟師由黑龍江

沂流而上抵特爾德尼城遇鄂羅斯八艘見我師而

遁公追及之宣上德意降七十餘人送京師

軍統兵駐阿蘇里經略鄂羅斯之事悉以委焉阿蘇

里者進取雅克薩城之要路而鄂倫春部中遮之為

之咽喉雖內附我而畏鄂羅斯之偏倚陰與之通公

欲進兵慮其為梗乃使其族長朱爾空額等諭之布

朝廷威德示以禍福令與鄂羅斯絕鄂倫春部眾咸感悟遂殺鄂羅斯四十餘人送其首爲驗公厚賞之則復殺二十餘人自是鄂倫春與鄂羅斯相仇而我兵進取無復卻顧矣二十三年遣兵取恆滾河鄂羅斯遁去進至國庫爾河獲四十七人送京師二十四年公率兵取雅克薩城先遣精銳擊其哨兵盡擒之大兵猝至城下用破急攻聲振天地守將厄里克賽莫知爲計遂以城降而鄂羅斯於是失其險矣捷聞已振更欲以德柔服之遂釋厄里克賽回國二十五年厄里克賽復率兵眾踞雅克薩城公奏請進剿引兵由平武進遇其哨兵擒之遂抵雅克薩城下鄂羅斯出戰擊敗之次日攻其城不下圍之一日大霧公料敵必乘我乃嚴陣以待果驢出復大敗之擒生口問城中虛實知敵已力竭城旦暮且下而罷兵之上終欲服以德不欲窮極兵威故有是命公乃解圍去二十八年上命內大臣索額圖國舅佟國綱率禁旅將軍薩布素帥黑龍江舟師會

於厄不楚城平郭羅斯察罕汗遣使費約多爾等求
成以格爾必齊河爲界東南至圖古魯河拓疆六千
餘里而索倫郭倫春諸部始有甯宇矣是年有
詔於黑龍江墨爾根二處設兵築城浚隍造廬舍
開屯田皆公身執其役時喀爾喀等部爲噶爾丹所
襲殺越興嶺南竄索倫部復遮殺之掠其子女公聞
立帥兵往救援凡收落爾喀千餘至齊齊哈爾處以
遊牧之地治索倫罪奪所掠子女悉歸之而蒙古子
女爲郭羅斯所掠者亦贖歸親黨
諸番落聞之莫不感悅有泣下者
明年疏請以前索

倫總管安珠瑚等所種官田二千餘畝分給墨爾根

兵丁屯種

陳傳三十年以公總管索倫等部貢物公以各部生計土俗採捕之事擬爲則例七

條上請
悉從之
三十一年與甯古塔將軍佟寶奏建齊齊哈

爾城及伯都訥木城以科爾沁獻進錫伯卦爾察達

呼爾壯丁萬四千有奇分駐二城編佐領隸上三旗

並設防守防禦等官三十四年應

詔陳預備進剿噶爾丹事宜曰興安嶺北形勝之地索約爾
濟山爲最已遣熟識路徑官兵自

盛京吉林墨爾根三路度至山遠近分置程站其無火
處掘井以待若山之東北呼倫貝爾諸處有警則與
臣駐軍之地近卽率墨爾根兵先進吉林

盛京兵繼之若山之西烏喇輝諸處有警則

盛京兵先進臣率所部與吉林兵繼之皆會於索約爾

濟山

聖祖可其奏又

詔聞噶爾丹順克魯倫河而至其卽遠行偵探僥賊犯車臣
汗地相機禦勦卽踵其尾以進三十五年

聖祖親征噶爾丹由獨石口出中路大將軍費揚古由歸化
城出西路

命薩布素扼其東路仍

詔領侍衛內大臣等曰近聞噶爾丹將東行故令薩布素整
兵設偵防其竄逸所派盛京甯古塔及科爾沁兵悉歸統
轄口外所報軍務咸使知之尋疏言各路調集之兵於四
月初由索約爾濟山趨克魯倫河其月

薦臨克魯倫河噶爾丹西竄爲費揚古所敗

詔薩布素就喀爾喀河擇好水草處秣馬未幾

命率兵一千移駐科圖餘各遣還秋

詔分所部兵五百隸費揚古軍三十六年春

召入京尋同原任秋疏報沿河被水十八莊請以舊貯糧米

按丁散給

允之初墨爾哲氏屯長札努喀布克託等率眾內遷與甯古

塔將軍巴海編爲佐領四十號新滿洲事具巴海傳

又疏請於墨爾根兩翼各立一學設助教官選新滿

洲及錫伯索倫達呼爾每佐領下幼童一名教習書

藝是爲黑龍江建學之始至是

聖祖語廷臣曰人命所關重大數年以來盜案止誅首惡從犯免死發遣黑龍江每慮聚而生事嘗聞薩布素奏言兇徒分給新滿洲爲奴力散勢孤惡不能逞如此則不惟全活甚眾新滿洲亦資益良多矣三十七年疏劾錫伯達呼爾佐領阿穆瑚朗巴琳等曠誤防哨罷之秋

聖祖巡幸吉林

詔大學士等曰薩布素受任以來訓練士卒平定羅刹勤勞可嘉可予一等輕車都尉世職並以朕御袍及纓緯於眾前宣賜之

陳傳三十七年以公累戰功多美目爲將軍第一賜爵阿達哈哈番承襲六世

下詔褒

明年疏劾黑龍江副都統關保罷之協領都爾岱因

訐告其濫用驛站車馬諸款疏陳訐告在劾罷後

聖祖以關保久任侍衛

詔大學士等曰薩布素辦事雖明敏朕巡幸吉林見每逢迎
近侍朕聽政多年何事未厯僉王端良夫豈不辨彼近侍
何能爲關保各款俱實科不能袒護可卽令察審尋疏覆
關保疲勞驛站擬如律

命從寬降五級調用三十九年疏言黑龍江屯堡因災荒積
欠米石請俟豐年陸續交倉得

旨前羅刹侵擾內地是以駐兵黑龍江設立官堡遣員屯糧
原欲多積米石厚備軍儲令革任總督蔡毓榮經理十二

堡薩布素曾奏皆有成效後因十二堡荒棄無收復請停止屯種將壯丁改歸驛站其餘官堡通課日多並從前貯存倉米支散無餘致駐防兵餉匱乏薩布素難辭其咎令明白同奏尋疏言官屯耕種雖未失時而地氣早寒秋霜損稼又累經水旱不能交納官糧兵丁餬口無資因以舊存倉米按丁支放由臣庸劣不能遠謀所致至於奏停蔡毓榮所管十二屯堡耕種罪實難辭今請以齊齊哈爾墨爾根駐防兵每年輪派五百人遣往錫伯等處耕種官田督令未屆霜降悉行收穫夏秋間以船貯運至齊齊哈爾倉收存應買耕牛田器籽

種先於備存俸餉內支用次年收穫扣還則糧儲裕而兵餉可充疏下戶部察議錫伯屯種事宜應如所請其以蔡毓榮荒廢屯地妄報成效又給散貯存穀石不能嚴飭兵丁屯種納糧應令賠償逋穀千二百餘石歸倉仍請

旨治瞻徇罪

聖祖命侍郎滿丕等前往察訊明年春滿丕等奏徇私捏報屯種浮支倉穀罪應死得

旨免死褫任削世職在佐領上行走尋授散秩大臣未幾卒

陳傳四十年罷凡爲將軍二十載蒙
鞍馬尙食珍味甚多四十八年

賜衣裘
上追念公功

聖祖以

復領賜物公平生忠直無隱勞於國事惟力是視
用兵料敵制勝臨陣身先士卒故所向有功既以兩
戰之威擊服強敵而堅其詩成之志廣斥絕徼至數
千里屬部乂安而口未嘗言功歷仕數十年家無餘
財以康熙某年月日卒子幾人其官協領也
季常德忠勇有父風累官至將軍

本朝肇迹長白山溯厥發祥崇以秩祀禮亦宜之

敕遣內大臣覺羅武默訥前往瞻視時康熙十四年也山南
直吉林七百三十里往者折而西北可千五百里橫
亙千里高二百里五峰環立中有潭曰闔門百泉所
注竊然以深東南一峰稍下如門故名三大江並源
於此東流曰圖門江西北流曰松花江西南流曰鴨

綠江而山所旁迤西南曰

開運山又北而迤四曰

天柱山曰

隆業山龍蟠虎踞鬱鬱葱葱自餘迴環縣互方二千里
爲山爲嶺不一其名要皆支裔山海經所謂大荒之
中有山名不咸肅慎氏所國者也其夏武默訥等至
薩布素率兵二百攜三月糧導以行循溫德亨河陸
行七日至卓隆鄂河乘舟由幹努呼河逆流二日至
佛多和河順流一日抵訥殷伐木開道行三十餘里
登一高峰望見片片白光意其是矣計相去可百餘

里既復開道行一日詰朝雲霧塞徑彷彿有鶴鳴聲
尋聲疾走因得鹿蹊林木叢翳進至山麓跪誦

敕旨雲霧遂開山半坦若石甃平臺五峰外抱闔門潭淵然
其間綠潭陟山可五十餘丈徧地皆雪則曩所望片
片白光也蒼茫四顧邈無人蹤肅拜而返返至山麓
有鹿奔墜者七與仁視人數適符有若神飭行數武
迴望雲霧彌山矣武默訥歸奏

敕禮臣詳議封曰長白山之神秩祀如嶽鎮春秋望祭於吉
林城西南九里溫德亨山著爲典山蔚然深秀巖殿
在焉亦曰小白山蓋長白亦名太白云